

Gvangjsih Minzcuz Bau

Cawiguenj: Gvangsijh Bouxcuengh Swcigh Minzcuz Cunghgvau Swvu Veijvenzvei

Cawjbanh: Gvangsijh Minzcuz Bause

Geiz neix 8 bani

广西民族报 Aenhauh okbanj: CN45-0036 B.2025 Nd.12 Ng.17 Liggaeuq ietceih nienz ndwencib ngeihbet Geizsoq: Gungh daih 3698 geiz

Gvangjsih 9 Aen Gohgi Doxgap Hanghmoeg Baez Nduj Senjhaeuj Lenzhozgoz Anqlaeh Saedguh Maenhndei

12 nyied 12 hauh Swcigh Gohgidingh lwnh vunzlai rox, 9 aen gozci gohgi doxgap hanghmoeg Cungguk—Dunghmungz Gisuz Conjyiz Cunghsinh, Cungguk Diciz Gohyozyen Nganzungz Diciz Yenzgiuso, Gvangsijh Linzgohyen, Gvangsijh Cizvuz Yenzgiuso, Gvangsijh Swhfan Dayoz, Gveilinz Lijgungh Dayoz, Gveilinz Hangzdenh Gunhyez Yozyen bauq haenx, mboengqneix doenggvaq Lenzhozgoz Nanznanz Doxgap Banhgunghsiz bingzsaemj, baez nduj senjhaeuj aen anqlaeh saedguh maenhndei ndaej laebdaeb hwngfat bangrenz nanznanz doxgap caeuq sam fueng doxgap.

Ciuq cam rox, 9 aen anqlaeh

doxgap bauhamz nganzungz swhyenz ndaej laebdaeb yungh, doenghyiengh yw vayoz, doenghgo lai yiengh baujhoh, gvairah raok nonhah cazyouz, vanzging raemx gisuz cauhmoq, cauhmoq cauhnib caeuq aen hidungj genjcwz gvairah doenghgij dieg neix, guk doxgap baugvat Vwnzlaiz, Genjbujcai, Yindunizsihya, Yeznanz, Bah-gihshwdanj, Yihlangj doenghgij gukgya neix. Ndawde, 3 aen hanghmoeg doxgap maenhndei Cungguk Diciz Gohyozyen Nganzungz Diciz Yenzgiuso baengh Cungguk—Swhlozvwnznizya Nganzungz Diciz “Rangh Ndeu Loh Ndeu” Lienzhab Sizyenziz guh haenx ndei

raeh. Aen lienzhab sizyenziz neix youz Cungguk Diciz Gohyozyen Nganzungz Diciz Yenzgiuso (Gveilinz), Swhlozvwnznizya Gohyozye Yisuzyen Yenzgiu Cunghsinh Nganzungz Yenzgiuso caezhwnq, dwg aen bingzdaiz gohgi cauhmoq gaep gukgya, doenggvaq cauhlaeb camh muengx gamcaek rangh gvanhgen nganzungz “rangh ndeu loh ndeu”, yenzgiu guh aen biucinj gisuz gamcaek, doiqbeij faensik gij gapgya caeuq goengnaengz rangh gvanhgen nganzungz denjhingz, vih gajgez dieg nganzungz vanzging nanzdaez gunghawj cengjdingj. Bi’ gvaq 5 nyied, aen nganzungz gohyoz yenzgiuso neix baez nduj liedhaeuj aen vwnzgen

cingzcik cunzcam bouxdaeuz gukgya, doiq fugsah bouxdaeuz vaigyauh, daezswng gij rengz yingjyangj gozci aen dieg gohyoz nganzungz miz yungh lailai. Linghvaih, Cungguk—Dunghmungz Cauhmoq Cauhnieb Doxdax hawj Cungguk—Dunghmungz Gisuz Conjyiz Cunghsinh doenghgij danhvei neix caez banh haenx hix cingzcik ronghsak, aen daxdax neix daj 2022 nienz hainduj doxdaeuj, ciuyinx 35 aen gukgya caeuq gizdieg 752 aen doih caeuq giyez ngamq cauh daeuj caeuqfaenh.

(daj 《Gvangsijh Yizbau》 aeu daeuj genj hoiz Lij Sinhyungz Yez Veih)

Vuzcouh: Heuxsingz Gauhsuz Goengloh Nyaengq Hong

12 nyied 14 hauh, youq Vuzcouh Si Heuxsingz Gauhsuz Goengloh Duenhnamz Lungzhih Gih Sinhdi Cin Dungsingh Cunh Duzgwnhmuz Daihgiz dieg guhhong, vunzhong cingq guh najgiuz, bauj caetliengh, ciengjca seizgan ganj hong, yienhciengz nyaengqnyatnyat. Ndaw doz dwg guhhong yienhciengz.

(Yenz Gveihaij ingj)



2025 Gvangsijh Feihyiz Haeuj Yendonz Langhbaij Youq Nanzningz Guh

12 nyied 12 hauh, “yendonz cienzswnj • feihyiz vuenhmoq” gij yienghsaeh 2025 Gvangsijh feihyiz haeuj yendonz langhbaij youq Nanzningz guh. 20 aen conzbinj daengx gih gak si laeb gih, gaen diuz megloh “souj bonjcaen—hawj eiqmoq—yungz ndwenngoenz” guh langhbaij.

Baez yienghsaeh neix dwg Swcigh Dangjeij Senhconzbu, Swcigh Vwnzlenz, Swcigh Vwnzva Caeuq Lijyouz Dingh caez banh. Muzdiz dwg doenggvaq yendonz langhbaij, doinyoengx feihyiz ndaej cauhguh cienjvaq caeuq cauhmoq

hwngfat, daegbied dwg coihaeuj feihyiz daibyaujsing hanghmoeg yaek mied, yaek aeu baujhoh de hwnj daiz bae yienj. Feihyiz daibyaujsing hanghmoeg caeuqfaenh langhbaij baugvat vwnzyoz ndawbiengz, cienzdoengj yinhyoz, cienzdoengj diuqfoux, cienzdoengj heiq, gizyi, cienzdoengj dijuuz youzyi caeuq bajheiq daengj 6 loih, nangqdaengz gukgya, swcigh, si, yienh daengj 4 aen caengzgaep.

Aen yienghsaeh neix youq bineix 7 nyied hainduj, ciuyinx ndaw gih rog gih haujlai aen vwnzyi yendonz miz

rengz cienzswnj feihyiz de gaenx bauqmingz caeuqfaenh. Ginggvaq geizgonq bauqmingz, dapbuek bingzsaemj caeuq cingzcik goengbough doenghgij yamq neix le, mbiengj cawjbanh youq 11 nyied heuhcomz lauxhangz hangznib, canghheiq doiq mizgven vwnzyi yendonz guh “it bang it” capdieg son, son guhlawz gyalag laeb’ ei q cozbij, muzlien yienh’ ok yisuz, daezswng binjcaet diegnaeqsaec doenghgij neix, bangrenz vwnzyi yendonz cungbyoengq gizgaeb cauhguh, lai hawj conzbinj miz suijbingz.

Ngoenzhaenx langhbaij faen—baenz “feihyiz vuenhmoq” “yinh gaeuq cienz moq” “cingsaenz lauxcangh doxbungz” “cienzswnj coglaeng” daengj sei q aen biencieng. Langhbaij diemjrongh lailang: Boux doigawj soqcih AI “cwgzyi”, baengh yiengh “gangj gojgaeq + baeyouz lumj caen” doigawj Gvangsijh feihyiz; lauxhangz yozcej bienq “boux guhcingq vuenhmoq”, diemjbingz gij heiq caeuqfaenh langhbaij; gij heiq langhbaij bienbaiz miz bouhloh, yienjok yiengh moqsak.

(Vuz Yaujiyij)